

古今說部叢書

第五集

古今說部叢書

卷一百一十五

中國圖書公司記出版

丁未和會類要

四冊定價八角

丁未第二次萬國保和會。開會於荷蘭。我國於四十五國中。得占一席。其辦事員二十七人中。我國亦得占一人。此會之結果。議決國際要案甚多。而其關係於中國之議案亦不少。我國注意外交者。不可不讀也。書分四卷。卷各一大冊。

觚賸自序

原夫天爲石補光乃麗乎三辰地以鰲勝力且維乎四極蓮生嶽上巨靈運掌而山開鳥走雲中后羿彎弓而日落若其游神六合抗想千秋都非易測之情實有難窮之理然則莊生齊物何得置北溟而不談屈子離騷能無仰東皇而欲問乎況夫鬼盈睽載易畱語怪之文神降莘言史發興妖之論杏壇書垂筆削辨六鷁之晝飛龍門事著興亡誌一蛇之夜哭是知虞初小說非盡出於荒唐郭氏遺經固無傷於典則也余也生雖已晚世不逮夫鄉嬛思則靡涯心常傾夫蒼叢幼而就傅延吳札於楓江長且服官謁徐陵於柏府初垂縞帶便學長吟繼傍玉臺每聆新語入燕都而懷故國記覽夢華登梁苑而晤名賢書攜行秘迨夫哀纏素鞞貧典黑貂旅食三年不斷皋魚之淚宦歸千里無餘劉寵之錢遊跡則雁池鳬渚閱歷徧踪行裝則玉格貝編討搜獨富旣而聽雞函谷策馬蘆關歎密法於秦灰欲辨怪哉之氣懷和聲於周鳳還題吉了之名碑洞文章收諸綠笈橋山陵寢繪以黃圖今則仍綰銀章更臨珠海鷓鴣啼處朱旗

錦石之鄉蝴蝶飛時丹竈羽衣之洞官逢鬪穀得虎說於荒江語習嫵隅成魚
吟於蠻府粲花賓至快雄辯之當筵話兩人歸喜華賤之在篋於是傾觚授簡
抄以小胥因而別地稽時彙爲全帙言其大略蓋有三焉爾其簫斷吳門曲留
小海筑摧易水歌起悲風嵇散揮絃廣陵之音欲絕潘邠閣筆重陽之句無多
苟非闡此嘉名誰復求之幽壤至乃江頭孝女黃絹無傳塞外文姬青蛾莫贖
簾窺燕子新愁鎖夜月之樓門倚桃花舊笑憶春風之徑維美昭於繡管斯豔
發乎香簫更若大夫覲止雅擅多能君子至斯夙推博物疏不遺乎草木學迦
葩經註兼及乎蟲魚功期翼雅爰以資其考索非止襲夫傳聞然而宇宙茫茫
人如粟渺江河滾滾世亦萍浮目不越于方隅每以常而爲怪心苟通乎大造
將何幻而非真念茲得失之林總歸陳迹悟彼逝來之境庶得遐觀姑存此日
瑣言豈曰珠能記事倘附他年野史亦云稗以備官焉爾

康熙庚辰三月既望吳江鈕琇玉樵甫書於高明官署之根青閣

觚賸卷一

吳江鈕琇玉樵輯

吳觚上

歲寒集

余幼從吳南邨先生於家塾。受尚書左氏傳及時制義。所見著述甚富。惜在髫
亂。不及抄綴成編。未幾夫子下世。遺稿零落。越今三十餘載。偶於故篋中搜得
數章。敬錄於此。擬道路憶山中云。微陽澹遙薄。羈客困塵鞅。珪帛策今志。烟霞
屬蠹想。遲遲楚粵郊。一步一迴仰。靈境隔紫霄。夙昔憑誕放。墜萼薦春展。歸雲
麗秋斨。軒開納曙景。襟豁眷初爽。自生性情悅。願領丘壑長。浩浩九門津。恢恢
千目網。野犢被文錦。雖貴非所賞。銅斗瞻漸碧。禹穴顧已莽。新游非故鄉。登頓
益慨慷。空抱嵇生琴。戚戚發哀響。追和孟東野。審交云枳棘。初生時。青青似柑
柚。滋養待成林。芒刺傷我手。結交非其人。不但初心負。名義如日星。斯人等埃
垢。君子田中禾。小人田中莠。同畝而異根。安得秋實茂。寧爲管華薄。莫效蘇李

厚。厥初或依違。鮮終誰執咎。咏梅花云百卉千妍競艷陽。有人籬角問孤芳。寒交近與蒼松絕。濫籍秦官亦可傷。賦得城春草木深。二首云名區屯宿莽。春向幾人家。衙晚聽啼鳥。碑殘臥落花。堂巢無主燕。池唱在官蛙。何必曾侯印。東門徧種瓜。百戰餘荒壘。陽和尙草萊。青帘花外肆。烏鵲雨中臺。怨氣流爲火。腥痕繡作苔。登高如可賦。愧乏鮑生才。田家秋興云九月築場後。田家事事幽。斷橋霜下坂。修竹水邊樓。鷄犬無心晝。菰蒲有望秋。蒔蔬攜鋤短。栽枳結籬稠。燈火鄰舂共。魚書社飲修。落桑秔入甕。覆草稊成丘。簷曝貪朝坐。溪雲動晚謳。牽蘿閒補漏。策杖徧尋儔。夢以無因永。行緣得句留。所須無凍餒。城市有何求。寡女行云明月夜。照井上霜如。花寡女開中堂。當軒軋軋朝復暮。機中之錦他人裳。夜闌月轉燈燼滅。獨向空牀抱冰鍊。君不見東家鶴髮娘。垂老嫁人爲媵妾。西門行云西門有高塚。乃是城中富家兒。當年不樂爲後人嗤。後人嗤後人仍效。之日復一日。坐令青髻絲。疏布裘。屈木卮。此物我所製。奈何坐令他人嬉。城中車馬客。不向西門塚上馳。卽向西門塚上馳。塚中之人不能復起相追隨。請盡

今日歡。明日非我知。東門行云出東門。意欲前。欲前未及得。前遠聞兒啼。女泣。使我僕馬爲流連。君但行。勿留連。堂上有兩親。機中有絲日一縑。賤妾餽糟糠。終不令君親饑且寒。道傍之水泥濁濁。長安馬多食粟。一車覆。一車續。願君爲臣忠。爲吏廉。吹風到茅屋。結駟歸來非我欲。西山爽氣云。雨歇池館涼。開軒睨原隰。遙峰如盥櫛。蒼翠淨可吸。竹樹延清暉。苔階響餘滴。羣鳥次第起。遠背晨光沒。我意亦悅之。曳杖遙與卽。曠然融神魂。神領興自給。松風塞雙耳。米鹽詎容入。出門無可營。坦坦任所適。寄題周蟄菴新居二首云。周子幽棲處。浮名信可逃。竹纔埋瓦屋。水足受魚舠。近渚饒菰蔣。低簷見桔槔。從知予去後。雙板沒新蒿。苧桑通小徑。鷄犬自成邨。亂水繞三面。數家同一門。塾童來問字。鄰叟共攜尊。縱遣桃花出。無人解覓源。寄故鄉諸友云。白雲紅樹隱溪塘。何處登高可望鄉。百里畏途天外夢。兩年愁鬢客中霜。刺秦慚負千金諾。歸蜀空迴九曲腸。倘有貧交問流落。尙懸雙眼看蒼蒼。夫子爲王崑崙山人之甥。明末食餽歸安。名馳三吳兩浙間。鼎革後改名宗漢。號南邨。與兄東里弟西山偕隱。日以文酒

相娛并手輯同志之詩。曰歲寒集。先生爲人溫厚而嚴正。終其身絕跡城府。吳興莊氏子聘修明史。堅拒之。卒免於禍。

貞白樓詩

余族兄易庵先生名槩。與先君同受知於黎博庵副使。鼎革後。築樓溪濱。繞以修竹。而種菊其下。賦詩飲酒。絕意人世。自南邨師歿。先君卽命余從易庵遊。今易庵年已八十有二。無子以繼其傳。手抄貞白樓詩寄余。若翼余之傳之者。存其一二。亦可以見興象之恬。襟懷之峻矣。閨上已序云。上已不詩。閨而詩。紀異也。蘭亭已矣。楔事猶存。雖迹類嬉遊。而志存蠲袂。懷潔之士。實欣尙焉。於斯時也。澄澤流鮮。朗區披秀。洛川名閥。撫令節以舒光。洧水麗姝。激景風而吐豔。斯誠騷邁之歡辰。咏喁之良遘矣。迺者節序乖疎。賓朋散逸。黃龍夢杳。白水吟空。言念曩今。能無涕悼。當右軍作記。年冠永和。乃其臨流感慨。猶致歎於世殊事異。揆厥所悲。一何遐也。至元嘉祖道之篇。永明楔飲之什。金石畢陳。鈞天雜奏。宵眇寂寥。風斯邁矣。南樓倦倚。觸緒興哀。漫賦五言。忘其拙率。詩云。入春饒勝。

事我復愛花辰。曲水門闌舊。薰風節序新。祓除如有待。觴咏豈辭頻。寂寞尋芳侶。重來訪隱淪。上巳日種菊。云未肯忘秋興。霜花手自栽。力鋤非種去。懸想故人來。宿土承新露。疎籬傍老梅。相依成密友。日夕共徘徊。又秋懷十首。殊有靖節風致。今錄其二。風霜頗威厲。敗葉走階几。我庭日寥廓。一望盡披靡。人事苦衰謝。天道有傾否。古桂發幽馨。吾無隱乎爾。俯仰觀幻化。斯理本如此。又云西風頓涼冷。衣被應裝綿。妻兒負單夾。歛歛當我前。問我我不應。四顧空茫然。南鄰貧徹骨。北里富薰天。造物本不齊。豈復關愚賢。

西山五七言

吳西山重暉行十。南邨先生之弟。少年詩名甚著。惜早卒。其詩長於寫景。如野眺云。花明背郭寺。柳暗入村橋。醉歸云。荇亂牽搖櫓。鷗驚觸過船。村居云。木脫雲辭徑。禾登鳥集門。吳興旅次云。老藤隨樹倒。危石帶沙崩。村橋遠眺云。天長衆鳥去。林遠細烟升。春窓對雨云。窓雨沈花影。簷風落鳥聲。游峽石東山云。柳深鶯坐穩。栢老鶴巢危。曉寒云。霜花驕古木。水骨壓狂流。春夜步月云。暗香花

隱月。迷路樹鈎衣。七言如題畫云。遠水日斜漁倚棹。空山雲起客登樓。入山云。江寒雁落蘆花國。山冷人歸楓葉村。秋霽云。檻外雨過羣壑響。簷前風定一蟬聞。春怨云。驚殘好夢憎啼鳥。催理新妝惱侍兒。新遷云。竹孫脫籜看過屋。鷗母攜雛並浴川。雨望云。廢苑亭臺新牧隴。孤村烟水舊漁家。秋夜云。幽砌露寒蛩近榻。荒園槿落犬穿籬。皆可傳也。

布囊焚餘

張元著先生起自海中部落。解散竄身僧寺。杭守臣覘得之。與愛僕楊貫玉幕友羅自牧同被執。就逮之日。公烏巾葛衣。不言不食者數日。惟啜水而已。臨刑。二卒以竹輿舁至江口。先生從輿中出。見江上青山夾岸。始一言曰。好山色。因索筆研作絕命詞。付行刑者。自牧與貫玉俱從死焉。所著詩詞。貯一布囊。悉爲邏卒所焚。其遺在僧寺及民家者。僅數篇。近體三首云。義幟縱橫二十年。豈知閨位在於闕。桐江空繫嚴光釣。震澤難迴范蠡船。生比鴻毛猶負國。死將碧血欲支天。忠貞自是孤臣事。敢望千秋青史傳。又國亡家破欲何之。西子湖頭有

我師日月雙懸于氏墓。乾坤半壁岳家祠。慚將赤手分三席。特爲丹心借一枝。
他日素車東浙路。怒濤豈必盡鷗夷。又何事孤臣竟息機。魯戈不復挽斜暉。到
來晚節慚松栢。此去清風笑薜薇。雙鬢難容五嶽往。一帆仍向十洲歸。疊山遲
死文山蚤。青史他年任是非。古風一首云。蘇卿仗漢節。十九歲華遷。管寧客遼
陽。亦閱十九年。還朝千古事。歸國一身全。余生獨不辰。家國兩荒烟。飄零近廿
載。仰止愧前賢。豈意避秦人。反作楚囚憐。蒙頭來故里。城郭尙依然。彷彿丁令
威。魂遊華表巔。有覩此面目。難爲父老言。智者以爲辱。愚者笑我頑。或有賢達
士。謂此勝錦旋。人生七尺軀。百歲豈復延。所貴一寸丹。可踰金石堅。求仁而得
仁。抑又何難焉。

虎林軍營唱和

吳愧菴名炎。潘力田名樛。章才望相埒。康熙癸卯二月。同以史事株連。逮繫虎
林軍營。吳有營中送春詩云。一半春光縲絏過。唾壺敲缺待如何。鶯聲啼老聽
難到。柳絮飛殘撲轉多。晚晚斜陽運雉堞。朦朧短夢遶岩阿。不堪往事成回首。

總付錢塘東逝波。潘漫成四首。其一抱膝年來學避名。無端世網忽相嬰。望門不敢同張儉。割席應知愧管寧。兩世先疇悲欲絕。一家累卵杳難明。自憐腐草同湮沒。漫說雕蟲誤此生。其二吳關一路作羈縻。棘木庭前聽五詞。已分殘形輕似葉。却憐衛足不如葵。下堂真愧先賢訓。抱壁幾同楚客悲。從使平反能苟活。他年應廢蓼莪詩。其三園土初經二月春。薰風又到繫維身。流螢夜度綈袍冷。採蕨朝供麥飯新。敢望左驂歸越石。還期長珮擬靈均。多情最是他鄉侶。閒譜龜茲慰苦辛。其四閱歷風霜祇自疑。難將身世問時宜。窮愁只合吾儕事。姓氏羞爲獄吏知。見說成書刊鑄鼎。不聞有夢召胥靡。南山此去躬耕好。未可重題酒後詩。吳懷古四首咏岳武云將軍野戰最知名。半壁河山一力撐。義在春秋臣節殫。法過韜畧陣雲明。運移宋曆終江海。功就蘄王敢弟兄。痛飲黃龍千載恨。錢塘夜夜有潮聲。咏伍相國云闔闔行歌未死身。一言投契作宗臣。報仇暮日忘荊國。抉眼衰年看越人。羅刹江頭潮最怒。姑蘇臺畔草長新。蟲沙猿鶴無窮化。願向波濤問大神。咏蘇文忠云杭州刺史最風流。簫鼓樓船春復秋。

譏誚每攫丞相怒。判書常應老翁求。六橋花柳蒙遺澤。兩岸湖山紀勝遊。當日
憐才豈無意。蛾眉夜月照高丘。咏于忠肅云。開元城外黑雲屯。土木營邊日月
昏。手挾六龍羣喙定。身擔一線國威尊。戰爭有幾禁南牧。繪幣無多返北轅。兩
字獄成明主惜。高名贏得並乾坤。與美生對酌絕句云。平生恨不學屠沽。輸與
高陽一酒徒。此日尊前須盡醉。黃泉還有賣漿無。是歲五月。吳與潘俱磔於杭
之弼教坊。同死者二百餘人。先一日。吳語其弟曰。我輩必罹極刑。血肉狼籍。豈
能辨識。汝但視兩股上各有一火字者。卽我尸也。聞者無不流涕。

力田遺詩

潘耒章著述甚富。悉於被繫時遺亡。間有留之故人家者。因其罹法甚酷。輒廢
匿之。如杜詩博議一書。引據考証。糾訛闢舛。可謂少陵功臣。朱長孺箋詩。多所
採取。竟諱而不著其姓氏矣。余幼從學吳南村夫子時。曾錄其古近體詩數篇。
畱敝篋中。今檢而存之。并著博議所自。以俟能表章者。其讀五代史云。唐室亂
天紀。鷲猛化侯王。健者夜一呼。萬乘起徬徨。取守旣同道。貽謀安得良。遂令燕

雲地。化爲狼與羊。倒受太阿柄。失勢還自戕。有宋鑒其弊。居重御四方。矯枉失之過。國威遂不彊。善哉府兵制。作法貴於涼。卜居二首云。每愛西山好。烟霞無蚤昏。茶香晴送鶴。果熟曉爭猿。得意花顏色。會心鳥語言。幽尋偏得性。獨往志空存。極望草萋萋。春原肥乳羝。青桐誰見實。朱鳳爾何棲。短褐晨霜重。征塵夕照低。浣花溪有約。杖履不應違。關山月云。繡衣金匡匝。寶馬鐵連轡。出身誓向邊場死。那能宛轉妻兒前。離家復見故鄉月。見月思鄉情不歇。天山飛鳥却向南。隴頭流水分鳴咽。幕前健兒歌且悲。霜寒風勁胡馬肥。閨中遠不聞吹笛。塞上愁誰聽擣衣。可憐夜夜關山月。只照從軍不照歸。丁亥春與文心兄理平川舊業。歸途有感云。草堂幸已賦歸來。別業藍田且共栽。廢驛舊經征戰盡。野花初向別離開。數通畫角連笳起。一樹斜陽帶鳥回。照水獨憐華髮改。詩碁兩事老餘才。憶戊子秋過外家東衡里。因寄表弟章伯升云。數載烽烟隔渚隈。清溪埜色望中開。山將落日排雲去。水抱孤帆拂岸來。巷口燕巢春繞樹。門前虎跡曉衝苔。援琴四壁貧何恨。孫叔當年不治財。奕隱贈雲間謝繹之用枰字云。扁

舟問我雪溪行。坐覺九峰秀色生。當局盡從疑處失。先機誰向敗中爭。白雲侵戶明書几。紅葉當堦覆石枰。身世漁樵何處穩。獨能蟬蛻任浮名。酬王雲頑夕坐。有感見寄云。虛無映捲簾。林壑尙餘炎。露咽蟬高樹。風吹月短簷。雄談曾壓膽。怪事幾張髯。鄭重瑤華贈。聊從紫氣占。靈巖懷古云。半空塔影迴參差。入眼興衰欲問誰。麋鹿有情傷地僻。草花無主恨年移。溪山尙倚吳王劍。江月空彎西子眉。薄暮老僧爲指點。白雲封處六朝碑。和陶乞食詩。贈乞食諸公并序云。辛卯秋。村民十百爲輩。望門投食。予謂救災恤鄰。誼也。況上無所呼號。下不爲剽劫。而俛首一飯。猶良民也。淵明舊穀既沒。新穀未登。日月尙悠。爲患未已。乞食賢者之事。乃衆人優爲之。慨然有作。溝壑勢所迫。貿貿行安之。促步望烟火。低頭_正言辭。善悉主人意。高義無嗟來。升斗竭所餘。滿腹輒廢卮。感激話疇昔。內熟牂羊詩。同里無賑恤。曷云濟世材。愧客供給薄。強飯以相貽。移居詩。贈人云。近知卜築到江濱。遜跡聊依水岸分。波底白鷗漁有國。天邊蒼莢雁爲羣。故鄉回首桑麻接。曲徑通人鷄犬聞。吾亦經營滄海計。乘槎浩蕩一從君。

序賦創格

陳鶴客三島長洲人。崇禎末爲博士弟子有聲。國初晦跡授徒。然故國黍離之感。不去於懷。終以憂憤成疾。年三十有四而卒。曾爲余內兄畢西臨作當泣草序曰。畢子西臨以終生上策之年。懷太傅度湘之志。被明月於江臯。爰歌九辨。悲雨雪於阪道。兼作四愁。乃示予以詩。其自命曰當泣草。噫嘻悲夫。仙人羽蓋。望姑射以何歸。帝子霓旌。仰橋山而莫及。玉泉河畔。水漲桃花。銅馬門前。風吹秀麥。故府久爲拜月之庭。行宮竟作祭天之宅。朝圍獵騎。萬里揚沙。暮起巨歌。九門落日。西山草綠。誰傳社飯於諸陵。北殿貂黃。徒思臘酒於故闕。逢荆卿之故友。相對生悲。登樂毅之空臺。自然飲泣。若夫道指金陵。客歸江表。風景蕭條。河山綿邈。金鳧銀雁。盡出人間。細柳新蒲。悲從父老。鳳凰臺上。朝來麋鹿之遊。鳩鵲觀前。夕作牛羊之道。劉琨旣逝。嘯未舉而樓空。祖逖云亡。鷄旣鳴而天曉。山中公子。誰共攀夫桂樹。道上王孫。獨自尋夫芳草。遂乃下雲陽。登石屋。望遠則目屬青龍。臨空則悲生黃鶴。彈箏拊筑。傭工歌變徵之聲。短笛橫簫。乞食吹